



**CONVENIO ENTRE O INSTITUTO GALEGO DE PROMOCION ECONOMICA E O CONSELLO GALEGO DE CÁMARAS PARA INSTRUMENTAR UNHA ENCOMENDA DE XESTIÓN PARA A COLABORACIÓN TÉCNICA NA VALORACION OBXECTIVA DOS PROXECTOS PARA A SÚA DECLARACIÓN COMO INICIATIVAS EMPRESARIAIS PRIORITARIAS (LEI 5/2017), COMO PROXECTOS ESTRATÉXICOS (DECRETO LEXISLATIVO 1/2015) E COMO PROXECTOS SECTORIAIS (LEI 1/2021).**

## REUNIDOS

**Dunha parte,** Fernando Guldrís Iglesias, en nome e representación do Instituto Galego de Promoción Económica (en diante, IGAPE), con NIF Q6550010J e domicilio en Edificio Igape, Complexo Administrativo San Lázaro, s/n, 15707 Santiago de Compostela, na súa calidade de director xeral. Está facultado para este acto en virtude da delegación de facultades do 23 de decembro de 2016 do presidente do Igape feita pública mediante Resolución do 25 de xaneiro de 2017 (DOG nº 23, do 2 de febreiro de 2017).

**Doutra parte,** José García Costas, en nome e representación do Consello Galego de Cámaras, con NIF Q1500304I e domicilio en San Pedro de Mezonzo, 44- Baixo, 15702 Santiago de Compostela. Comparece na súa calidade de presidente da citada corporación, actuando en nome e representación da dita entidade, en virtude do seu nomeamento como presidente por acordo do Pleno do Consello na súa sesión celebrada o 14 de maio de 2019.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e

## EXPOÑEN

I.- Que o IGAPE, creado pola Lei 5/1992, do 10 de xuño (DOG núm. 122, do 26 de xuño) é a axencia de desenvolvemento rexional de Galicia e, entre os seus principais obxectivos, están os de fomentar a creación de novas empresas, promover a mellora da produtividade e competitividade das sociedades xa asentadas na Comunidade Autónoma, atraer investimentos foráneos e facilitar a internacionalización do tecido produtivo.

II.- Que o Consello Galego de Cámaras créase na Lei 5/2004 de cámaras oficiais de comercio, industria e navegación de Galicia (DOG núm. 140, do 21 de xullo), como corporación de dereito público con personalidade xurídica e plena capacidade de obrar, na súa calidade de organismo de representación, relación e coordinación das cámaras e como órgano consultivo e colaborador da Xunta de Galicia e das administracións públicas en xeral. Entre as súas funcións está a de colaborar coa administración autonómica nos supostos en que sexa requirido por esta, emitindo informes ou realizando estudos, proxectos, traballos e accións en materia de comercio, industria ou navegación que afecten o conxunto da Comunidade Autónoma. Nos supostos e coas condicións e alcance que estableza a Administración autonómica, corresponderalle colaborar, se é o caso, na tramitación de programas públicos de axudas ás empresas, na xestión de servizos públicos e no desempeño das funcións administrativas que se lle encomenden.



III.- A Lei 9/2021, do 25 de febreiro, de simplificación administrativa e de apoio á reactivación económica de Galicia (DOG núm. 39, do 26 de febreiro) modifica o texto refundido das disposicións legais da Comunidade Autónoma de Galicia en materia de política industrial aprobado polo Decreto Lexislativo 1/2015, do 12 de febreiro, así como a Lei 5/2017, do 19 de outubro, de fomento da implantación de iniciativas empresariais en Galicia, e así como a Lei 1/2021, do 8 de xaneiro, de ordenación do territorio de Galicia. Posteriormente, a Lei 18/2021, do 27 de decembro, de medidas fiscais e administrativas, modifica o artigo 79 do Decreto lexislativo 1/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de política industrial.

IV.- Segundo os novos textos legais serán considerados proxectos industriais estratéxicos (coa excepción de proxectos eólicos), aquelas iniciativas empresariais que cumpran, cando menos dous dos seguintes requisitos:

- a) Que supoñan un volume de investimento mínimo de 20 millóns de euros.
- b) Que supoñan unha creación de emprego mínimo de cen postos de traballo directos, baixo a modalidade de contrato indefinido e computados a xornada completa.
- c) Que complementen cadeas de valor ou que pertencen a sectores considerados estratéxicos e estean aliñados cos obxectivos da Unión Europea ou que se integren no financiamento "instrumento temporal de recuperación europea Next Generation EU".

V.- Ademais, o Consello da Xunta de Galicia poderá declarar como iniciativa empresarial prioritaria aquelas que cumpran cando menos dous dos seguintes requisitos:

- a) Que supoñan un volume de investimento mínimo en activos fixos, excluídos os inmobiliarios, dun millón de euros
- b) Que supoñan unha creación de emprego mínimo de vinte e cinco postos de traballo directos, baixo a modalidade de contrato indefinido e computados a xornada completa, non sendo de aplicación para os proxectos regulados na Lei 8/2009, do 22 de decembro.
- c) Instrumentos de mobilización, recuperación, posta en produción e aproveitamento sustentable de terras agrarias e forestais, así como plans ou actuacións integrais de desenvolvemento rural.
- d) Que complementen cadeas de valor ou que pertencen a sectores considerados estratéxicos ou que se integren no financiamento instrumento temporal de recuperación europea Next Generation EU.

VI.- Por todo o dito, tanto a figura das "Iniciativas empresariais prioritarias" creadas na Lei 5/2017, como a dos "Proxectos estratéxicos", creada polo Decreto Lexislativo 1/2015, do 12 de febreiro, e os "Proxectos Sectoriais" definidos na Lei 9/2021, do 25 de febreiro, precisan da valoración do impacto na economía galega dos proxectos a estudo.

VII.- Que entre os medios que a Lei 16/2010, de 17 de decembro, de organización e funcionamento da Administración Xeral e do sector público autonómico de Galicia recolle para a realización de actividades de carácter material, técnico ou de servizos da competencia dos órganos da Administración Xeral da Comunidade Autónoma de Galicia ou das entidades de dereito público dependentes dela, por razóns de eficacia ou cando non se posúan os medios idóneos para o seu desempeño, atópase a encomenda de xestión intersubxectiva entre administracións públicas e entidades públicas, que se articulará por medio de convenios interadministrativos de colaboración. O Igape non conta cos medios humanos idóneos para a realización das tarefas obxecto da encomenda, constituíndo as



Cámaras de Comercio, Industria e Navegación, polas atribucións que teñen asignadas pola normativa vixente e o carácter eminentemente técnico das funcións que realizan, as entidades idóneas para a execución das citadas tarefas.

Por todo o exposto, ambas as partes, acordan subscribir o presente convenio, que se rexerá polas seguintes:

## CLÁUSULAS

### Primeira.- Obxecto

O obxecto do presente convenio é instrumentar e regular as condicións específicas que rexerán a encomenda de xestión entre o Igape e o Consello Galego de Cámaras para o desenvolvemento das actividades técnicas necesarias para a realización das seguintes tarefas:

1. O apoio técnico na valoración do cumprimento dos requisitos establecidos no artigo 42.1 d) da Lei 5/2017, do 19 de outubro, de Fomento da implantación de iniciativas empresariais en Galicia. En particular, realizar a obxectivación da información que acredite o cumprimento do criterio establecido na letra d) "Que complementen cadeas de valor ou que pertencen a sectores considerados estratéxicos ou que se integren no financiamento instrumento temporal de recuperación europea Next Generation EU". Prestarán o seu asesoramento experto, de acordo co previsto na citada norma, expoñendo a Igape a súa apreciación técnica sobre a concorrencia destes extremos no correspondente expediente.
2. O apoio técnico na valoración do cumprimento dos requisitos establecidos no artigo 78 c) do texto refundido das disposicións legais da Comunidade Autónoma de Galicia en materia de política industrial, aprobado polo Decreto Lexislativo 1/2015, do 12 de febreiro. En particular, a obxectivación da información que acredite o cumprimento do criterio c) "Que complementen cadeas de valor ou que pertencen a sectores considerados estratéxicos e estean aliñados cos obxectivos da Unión Europea ou que se integren no financiamento "instrumento temporal de recuperación europea Next Generation EU". Prestarán o seu asesoramento experto, de acordo co previsto na citada norma, expoñendo a Igape a súa apreciación técnica sobre a concorrencia destes extremos no correspondente expediente.
3. Para os efectos da declaración de proxecto industrial estratéxico, o apoio técnico na análise e verificación de que o proxecto achega a documentación requirida no artigo 79 do Decreto lexislativo 1/2015, de 12 de febreiro, polo que se aproba o texto refundido das disposicións legais da Comunidade Autónoma de Galicia en materia de política industrial, modificado pola Lei 18/2021, do 27 de decembro, de medidas fiscais e administrativas e que indica a documentación a achegar pola empresa interesada para a declaración dunha proposta de investimento como proxecto industrial estratéxico. Neste eido, o apoio consistirá na asistencia no estudo, análise e avaliación da documentación que forma parte do expediente, trasladando a súa opinión técnica a Igape que, en todo caso, será o órgano responsable da decisión sobre a concorrencia no expediente de toda a documentación requirida e do cumprimento dos requisitos establecidos.



4. Para os efectos da declaración de proxecto sectorial, apoio técnico na valoración da función vertebradora e estruturante do territorio, de impulso e de dinamización demográfica, así como da incidencia territorial, económica, social ou cultural, a súa magnitude ou singulares características, que fagan un proxecto acredor dun interese supramunicipal cualificado, non só porque a súa situación sexa en máis dun concello. O apoio concretarase nun pronunciamento estritamente técnico, logo da análise de todas as variables que concorran, que lle permitan a Igape valorar o impacto dun proxecto en termos económicos e sociais no seu entorno.

En todos os casos, as tarefas que realizarán as cámaras cínxense a unha achega estritamente técnica, na súa calidade de experto nas materias obxecto da encomenda. A avaliación e verificación final do cumprimento de requisitos será efectuada por Igape, quen adoptará as decisións e acordos que procedan en dereito.

### **Segunda.- Xustificación da utilización da figura do convenio de encomenda de xestión**

Motívase a utilización da figura do convenio de encomenda de xestión en que o Consello Galego de Cámaras é órgano consultivo e colaborador da Xunta de Galicia e das administracións públicas en xeral. Entre as súas funcións está a de colaborar coa administración autonómica nos supostos en que sexa requirido por esta, emitindo informes ou realizando estudos, proxectos, traballos e accións en materia de comercio, industria ou navegación que afecten o conxunto da Comunidade Autónoma. Nos supostos e coas condicións e alcance que estableza a Administración autonómica, corresponderalle colaborar, se é o caso, na tramitación de programas públicos de axudas ás empresas, na xestión de servizos públicos e no desempeño das funcións administrativas que se lle encomenden.

A encomenda de xestión non supón cesión de titularidade da competencia nin dos elementos substantivos do seu exercicio, e será responsabilidade do órgano encomendante ditar cantos actos ou cantas resolucións de carácter xurídico lle dean soporte á concreta actividade material obxecto de encomenda ou aqueles nos que esta se integre.

Este convenio executarase a través das distintas Cámaras de Comercio que integran o Consello Galego de Cámaras. As Cámaras de Comercio poderán colaborar entre elas na realización das tarefas recollidas na cláusula primeira.

### **Terceira.- Obrigas do Igape**

- Ditar cantos actos ou resolucións de carácter xurídico dean soporte ou nos que se integran as actividades encomendadas na cláusula primeira, logo da súa supervisión e control.
- Supervisar que as actividades sexan desenvolvidas de acordo coas estipulacións do presente convenio e ditar as instrucións que se estimen precisas para a referida colaboración.
- Poñer a disposición do Consello Galego de Cámaras os materiais e medios técnicos necesarios e a documentación técnica e divulgativa de apoio que lle sexa requirida para o axeitado desenvolvemento desta colaboración. O persoal técnico do Igape colaborará e asesorará ao persoal adscrito polo Consello Galego de Cámaras nesta colaboración para as explicacións, trámites ou xestións que lles soliciten.



- Achegar a cantidade máxima de 70.000 € para sufragar os gastos ocasionados polas actividades encomendadas, e sempre cunha finalidade compensatoria dos mesmos.

O Consello Galego de Cámaras carece de ánimo de lucro na realización das actuacións obxecto do convenio, polo que a contribución pecuniaria responde a unha compensación dos gastos que terán que soportar de cara a lograr a efectividade e execución do convenio.

- Coordinar, desde o punto de vista técnico, os traballos para a realización e desenvolvemento das accións e actuacións obxecto deste convenio, de maneira que se complementen cos traballos levados a cabo polo persoal técnico do Igape.
- Designar un/unha técnico/a, como coordinador/a, coa función de certificar a entrega dos informes e a súa adecuación ás estipulacións do presente convenio.
- Remitir ao coordinador designado polo Consello Galego de Cámaras aquela documentación que sexa necesaria sobre o expediente que corresponda, para a súa valoración técnica.

#### **Cuarta.- Obrigas do Consello Galego de Cámaras**

- Remitir ao Igape as valoracións e análises técnicos elaborados polas Cámaras de Comercio acoutados ás consultas que corresponda para cada expediente, nun prazo máximo de 15 días naturais dende a solicitude. Cando as dificultades do expediente o aconsellen, o Igape poderá conceder, a solicitude do Consello Galego de Cámaras, unha ampliación do prazo por 5 días naturais máis.
- Observará os principios de confidencialidade da documentación técnica e divulgativa de apoio que lle sexa facilitada polo Igape para o axeitado desenvolvemento desta colaboración.
- Designará un coordinador, responsable de xestionar a documentación remitida polo IGAPE, para valoración e análise solicitados, sendo o interlocutor se fose preciso complementar ou aclarar a documentación remitida.

#### **Quinta.- Xustificación e pagamento das contribucións do Igape**

1. Igape achegará para o financiamento do custo das accións previstas no presente convenio un importe total máximo de (70.000,00€). Esta cantidade será aboada con cargo aos orzamentos do Igape para o ano 2022, nos que existe crédito adecuado e suficiente para financiar ata o 100% esta achega, conforme á partida orzamentaria 06.A1.741A.6400. O ANEXO I "Memoria económica" detalla esta contribución.

2. A achega citada destinarase exclusivamente a cubrir os custos precisos para a execución das actividades necesarias para o cumprimento do convenio, considerándose gastos cubertos polas achegas aqueles que de xeito indubidable respondan á natureza da actividade. Os gastos deberán ser realizados e efectivamente pagados dende a data da sinatura do convenio ata o 15 de decembro de 2022.



3. A contribución do Igape en concepto de compensación de gastos será aboada unha vez que o Consello Galego de Cámaras solicite o pagamento mediante a remisión ao Igape das certificacións de gastos comprensivas dos gastos incorridos polas Cámaras de Comercio e a correspondente documentación xustificativa, que serán presentadas con periodicidade trimestral. Os pagamentos parciais estarán suxeitos ao cumprimento de obxectivos parciais do convenio, que se xustificarán mediante informe das actuacións realizadas polas Cámaras de Comercio que acredite o dito cumprimento, ademais dos documentos xustificativos dos gastos. A data límite de xustificación será o 15 de decembro de 2022. Non obstante o anterior, tendo en conta que é atendible o custo laboral bruto, para a xustificación da totalidade dos custos de persoal realizados no último período do ano, serán tidos en conta os xustificantes de pago das nóminas, da Seguridade Social e ingreso do IRPF correspondentes a meses de 2022, aínda que o seu pagamento se realice, conforme a normativa reguladora, con posterioridade a esta data. Ditos xustificantes serán achegados ao Igape, á maior brevidade posible, unha vez realizados os correspondentes pagos.

Coa solicitude de pagamento deberá achegarse unha declaración responsable de que non existe ánimo de lucro e que os importes reclamados se circunscriben á compensación polos gastos nos que teña incorrido a respectiva cámara de comercio para a execución das tarefas obxecto do convenio. Esta declaración responsable expedirase de xeito individual pola Cámara de Comercio para cada un dos informes que se acheguen.

4. As liquidacións presentaranse vía electrónica, na oficina virtual do Igape na páxina <http://tramita.igape.es>, en particular a través do código de procedemento PE001, achegando as copias dixitalizadas dos informes das actuacións realizadas ata o momento polas Cámaras de Comercio, das facturas e documentos xustificativos do pagamento, xunto con:

a) Certificacións expedidas polas respectivas administracións públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Xerencia do Igape realice estas consultas polos seus propios medios.

b) Declaración responsable da titularidade da conta bancaria onde se debe realizar o pagamento.

c) Ademais, e para xustificar os gastos nos que teña incorrido o Consello Galego de Cámaras a través das Cámaras de Comercio ao presente convenio, relación, mediante documentos oficiais correspondentes tales como facturas, nóminas, etc., dos gastos propios incorridos para o desenvolvemento das distintas obrigas que asume, entre os que caben salientar os seguintes:

- Gastos de persoal, así como o 15% dos mesmos en concepto de gastos indirectos (gastos operativos da sede social: teléfono, auga, luz..)
- Outros gastos incorridos imputables ás obrigas que asuma.

Todos os gastos computables deberan ser xustificados mediante transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.



5. O Consello Galego de Cámaras responsabilizaranse da veracidade dos documentos que presente. Coa solicitude de pagamento deberá achegarse unha declaración responsable de que non existe ánimo de lucro e que os importes reclamados se circunscriben á compensación polos gastos nos que teña incorrido a respectiva Cámara de Comercio para a execución das tarefas obxecto do convenio. Esta declaración responsable expedirase pola Cámara de Comercio de xeito individual para cada un dos informes que se acheguen.

6. En todo caso, o Igape, resérvase o dereito de solicitar toda a documentación que se considere precisa en relación coa realización das actuacións obxecto do presente convenio, e calquera outra que estime oportuna para a correcta xustificación do gasto e o seu pagamento.

7. O Consello Galego de Cámaras manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

8. Procederá a minoración das contribucións cando as actuacións desenvolvidas e xustificadas o abeiro deste convenio non acaden os importes dos gastos xustificables e sempre que esta minoración non supoña unha realización deficiente do proxecto.

#### **Sexta.- Comisión de Seguimento**

Para facilitar a execución e desenvolvemento así como o seguimento e cumprimento do presente convenio, constituirase unha comisión formada por dous/dúas representantes de cada parte asinante. Esta Comisión actuará como órgano de vixilancia, seguimento e control do establecido neste convenio. Así mesmo, esta comisión supervisará a programación das actividades concretas ás que se refire o presente convenio, e avaliará e controlará as actividades realizadas.

A comisión reunirse en sesión constitutiva nun prazo non superior a un mes desde a sinatura deste convenio. Así mesmo, reunirse tantas veces como o soliciten as partes para analizar o grao de cumprimento dos obxectivos fixados, propor a resolución dos conflitos específicos que puidesen exporse e realizar calquera outra actuación de coordinación que se estime precisa.

O Presidente da Comisión terá voto dirimente.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

#### **Sétima.- Seguridade da información**

O Consello Galego de Cámaras terá a consideración de encargado do tratamento en relación cos datos persoais aos que, no seu caso, teña acceso no desenvolvemento do convenio e comprométese ao cumprimento de todas as obrigas derivadas da Lei Orgánica



3/2018, do 5 de decembro de protección de datos persoais e garantía dos dereitos dixitais e do Regulamento 2016/679, Xeral de Protección de Datos.

### **Oitava.- Vixencia e causas de resolución**

O presente convenio entrará en vigor o día da súa sinatura e terá vixencia ata o 30 de decembro de 2022.

O convenio extinguirase polo cumprimento das actuacións que constitúen o seu obxecto ou por incorrer en causa de resolución. Son causas de resolución:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumplidora un requirimento para que cumpra nun prazo de 10 días hábiles coas obrigas ou compromisos que se consideren incumplidos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Introducción de modificacións substanciais sen que as mesmas se aceptasen pola Comisión de Seguimento.
- f) Por calquera outra causa distinta das anteriores prevista no convenio ou noutras leis.

Se cando concorran calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, acordarán a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

### **Novena.- Modificación**

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

### **Décima.- Publicidade da subscripción do convenio**

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, o Igape e a Vicepresidencia Primeira e Consellería de Economía, Industria e Innovación publicarán no Diario Oficial de Galicia, no Portal de transparencia e Goberno aberto e na súa páxina web oficial o importe da prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade,



así como a súa cesión por parte do Igape aos órganos competentes da Vicepresidencia Primeira e Consellería de Economía, Industria e Innovación.

O Consello Galego de Cámaras deberá subministrar toda a información necesaria para que o Igape poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

### **Undécima.- Propiedade intelectual**

A documentación xerada como consecuencia da colaboración no proxecto serán propiedade conxunta do Consello Galego de Cámaras e o IGAPE. Na medida en que a mesma sexa susceptible de protección mediante o réxime da propiedade intelectual, seralles de aplicación o disposto no artigo 7 do Texto Refundido da Propiedade Intelectual, relativo á obra en colaboración.

A titularidade de todos os dereitos de propiedade intelectual inherentes á documentación elaborada, serán do Consello Galego de Cámaras e o IGAPE por ámbito mundial e polo prazo de protección dos dereitos de propiedade intelectual, de acordo coa normativa nacional e comunitaria aplicable.

### **Duodécima.- Responsabilidade**

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e o Igape, de tal xeito que non se poderá esixir a este instituto responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

### **Décimo terceira.- Autorizacións**

O Consello Galego de Cámaras consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación cancelación e oposición respecto do contido dos rexistros antes citados, ante a Dirección Xeral do Instituto Galego de Promoción Económica, sito no complexo administrativo de San Lázaro s/n, 15707 Santiago de Compostela.

Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización ao Igape para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia, no caso de que se deban presentar estes certificados en fase de emenda, logo de que a consulta polo Igape non obtivese resultado favorable.



#### **Décimo cuarta.- Natureza e normativa**

O presente convenio ten natureza administrativa quedando fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE, do 26 de febreiro de 2014, de conformidade co seu artigo 6, e para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

As partes comprométense a resolver de común acordo, ante a Comisión de Seguimento, calquera controversia que puidese suscitarse sobre a interpretación ou execución deste convenio. En caso de conflito as partes acordan o sometemento á Xurisdición Contencioso-Administrativa.

Para todo o non previsto neste convenio aplicarase o previsto na Lei 16/2010, de 17 de decembro, de organización e funcionamento da Administración Xeral e do sector público autonómico de Galicia, a Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non contradiga a primeira.

E en proba de conformidade, as partes asinan o presente convenio o 20 de maio de 2022.

Polo Instituto Galego de  
Promoción Económica:

Polo Consello Galego de Cámaras:

Fernando Guldrís Iglesias

José García Costas



## ANEXO I MEMORIA ECONÓMICA

**CONVENIO ENTRE O INSTITUTO GALEGO DE PROMOCION ECONOMICA E O CONSELLO GALEGO DE CÁMARAS PARA INSTRUMENTAR UNHA ENCOMENDA DE XESTIÓN PARA A COLABORACIÓN TÉCNICA NA VALORACION OBXECTIVA DOS PROXECTOS PARA A SÚA DECLARACIÓN COMO INICIATIVAS EMPRESARIAIS PRIORITARIAS (LEY 5/2017), COMO PROXECTOS ESTRATÉXICOS (DECRETO LEXISLATIVO 1/2015) E COMO PROXECTOS SECTORIAIS (LEY 1/2021).**

Para a realización das actuacións obxecto do presente convenio o Igape contribuirá cun máximo de 70.000 € con cargo á partida orzamentaria 06.A1.741A.640.0 para o ano 2022.

Partida orzamentaria	Ano 2022
06.A1.741A.640.0	70.000 €

Considéranse gastos atendibles aqueles que de xeito indubidable responden á natureza das actividades e fins do convenio, segundo a xustificación que achegue con periodicidade trimestral o Consello Galego de Cámaras.

Así, o Igape compensará os gastos xustificadas cun orzamento máximo de 70.000 €, estimando un custo máximo por cada colaboración técnica segundo o resumo seguinte:

Acción	PROXECTO INDUSTRIAL ESTRATÉXICO	INICIATIVAS EMPRESARIAIS PRIORITARIAS	PROXECTO SECTORIAL
<b>TOTAL</b>	<b>7.000 € (IVE non incluído)</b>	<b>600 € (IVE non incluído)</b>	<b>600 € (IVE non incluído)</b>

O Consello Galego de Cámaras remitirá ao Igape a seguinte documentación xustificativa por cada colaboración técnica:

1.-Custos de persoal de apoio técnico das Cámaras de Comercio dedicado ao obxecto do convenio.

Suxeito á presentación dun informe onde se relacione cando menos unha descrición da tarefa (vinculada ao obxecto do convenio), número de horas dedicadas, data de realización e nome da persoa que a realiza, tendo que anexar os documentos que proben a situación de alta desa persoa na Cámara de Comercio que corresponda, nas datas de realización das tarefas, segundo o importe/hora que perciba o citado persoal en función da súa categoría profesional e axeitado a prezos de mercado para categorías iguais ou equivalentes.

2.-Custos indirectos derivados da realización das tarefas obxecto do convenio, calculadas segundo o punto anterior e imputables á dedicación do persoal propio das Cámaras de Comercio.

Estímanse un importe de custos indirectos resultantes de aplicar unha porcentaxe do 15% aos custos laborais derivados do disposto no apartado anterior (esta porcentaxe ten a súa orixe e referencia na normativa europea sobre OCS custos simplificados). Estes costes fan referencia a gastos coma a luz, auga, limpeza, teléfono, etc. ...



3.-Custos directos derivados dos encargos a terceiros que requira a realización polo Consello Galego de Cámaras das tarefas obxecto do convenio. Neste caso, suxeito á xustificación dos encargos que efectúe o Consello Galego de Cámaras para a emisión de valoracións técnicas especializadas, cando as Cámaras de Comercio non dispoñan de persoal especialista de seu, coa achega dos documentos acreditativos do encargo e do seu efectivo pagamento.

O Consello Galego de Cámaras aportará con cada valoración técnica unha declaración responsable de que non existe ánimo de lucro e que os importes reclamados se circunscriben á compensación polos gastos nos que teña incorrido a respectiva Cámara de Comercio para a execución das tarefas obxecto do convenio. Esta declaración responsable expedirase pola Cámara de Comercio de xeito individual para cada un dos informes que se acheguen.